

四庫全書

史部

欽定四庫全書

欽定八旗通志卷一百七十七

人物志五十七

大臣傳四十三

滿洲正藍旗三
性桂阿克敦

錫伯
諾岷

陶岱
蘇昌

明山

錫伯

錫伯滿洲正藍旗人姓瓜勒佳康熙十四年以護軍隨前鋒統領穆占討叛鎮王輔臣于平涼時偽

總兵高鼎蔡元據龍州仙逸關列陣于關山河岸
錫伯先登陷陣左右衝突身被數創益力戰大敗
之叙功列頭等賞銀五十兩復隨大軍破平涼城
外賊于虎山墩王輔臣降進征湖廣十六年隨將
軍鄂爾擊賊于洞庭湖舟師進逼君山戰數日賊
固守岳州不敢出十八年隨將軍林興珠擊賊首
吳國貴敗之遂復武岡州進克楓木嶺二十年隨
將軍賚塔敗賊將何繼祖于黃草壩抵雲南城下

大將軍彰泰賚塔合兵營歸化寺賊渠吳世璠以
衆萬餘驅象迎敵官兵分隊進攻錫伯列第二隊
直前破賊叙功二等賞銀四十兩二十七年由前
鋒授典儀三十五年隨征噶爾丹三十八年遷驍
騎校四十七年遷侍衛五十年遷前鋒叅領六十
一年授左翼步軍總尉雍正二年加副都統銜食
俸時青海平定議設將軍副都統于寧夏駐滿洲
馬步兵三千四百三年二月

特命錫伯為寧夏將軍領八旗兵由殺虎口經鄂爾多斯
部進橫城口六月抵寧夏任七月奏八旗官兵陸
續到齊沿途水草豐盛兵眷安妥得

旨錫伯帶領官兵沿途並無擾累生事善為料理甚屬可
嘉下部議叙加一級四年奏阿拉善谷內地寬可作牧
廠請將喀朗塢西南至中衛為綠旗牧廠喀朗塢
東北至石嘴子為滿兵牧廠官兵等駝馬按數出
牧下部知之七年十月以勤慎奉職

諭加太子少保十一月

諭曰錫伯係征勦南省頗著勤勞之人現今大臣中與伊相似者甚少而伊復于軍前衝鋒陷陣得有傷痕簡任將軍以來約束兵丁盡職効力為將軍中特出之人可給騎都尉世職准襲二次八年十月卒于官奏入得

旨錫伯居官勤慎老成練達軍前効力著有成勞簡擢寧夏將軍撫輯兵民整飭營伍實心黽勉邊疆重地正資料理今聞溘逝深為憫惻賞銀一千兩以為喪事之資

靈輿准入京城大臣侍衛等迎奠下部議卹

賜祭奠如例謚襄壯子喜柱襲騎都尉職

陶岱

陶岱滿洲正藍旗人姓瓜勒佳由主事歷遷戶部

郎中康熙三十三年二月

上以積貯米穀有裨

命截留山東漕米二萬石從天津海運至三岔口交

盛京戶部收貯

命陶岱督運

諭曰此路易行但不可欲速船戶習知水性風勢必須相風勢而行毋堅執己見其一路水勢地形詳悉識之此路既開日後運米事可無難矣尋遷內閣侍讀學士六月擢內閣學士八月山東巡撫桑額疏請以登州等處米從天津運三岔口

諭曰前運米至盛京大有裨益學士陶岱現在天津著將天津現存米五萬石從海口運至三岔口之處會同地

方官議奏陶岱以天津現存米四千石穀三萬六千石以穀易米不敷五萬石之數議將近河州縣現存捐輸米內撥足五萬石運往得

旨近河州縣糧米著停止起運俟明春河南山東兩省漕米到後截留五萬石運送三十五年二月奉

命以海運至

盛京之米給散科爾沁之貧乏者六月遷戶部右侍郎尋轉左侍郎三十六年調吏部右侍郎三十七

年二月

上以朝鮮告饑願請于中江開市貿穀

命陶岱運米三萬石往朝鮮以萬石賚之二萬石平糶七月疏言臣于四月進中江將賞米萬石分賑其二萬石交戶部侍郎貝和諾監視貿易國王李焞具表謝章下所司

御製海運朝鮮記以紀其事三十八年五月署兩江總督八月奏言

聖主南巡省視惟恐貧民艱食截留漕米十萬石照時價減糶又貯十萬石備緩急前因淮揚等處米貴請將留貯米動用四萬石照前減糶荷蒙

俞允今淮揚等處小民仍艱粒食且督修河工人等羣聚需米甚多請將所餘米六萬石照前減價發糶疏入格于部議

特允所請三十九年正月疏免泗州盱眙地丁等項錢糧尋授倉場侍郎四十年以漕船由外河運至石壩

致抵通遲誤陶岱不將經紀勒索旗丁事審奏部
議降一級罰俸一年

諭曰陶岱向署兩江總督聲名甚劣既授倉場仍不改前
轍非可任用之人著降五級隨旗行走尋卒

性桂

性桂滿洲正藍旗人姓王氏先世居義州

國初來歸康熙四十五年性桂由天文生補欽天監
博士洊授靈臺郎五十九年遷五官正六十年補

刑部主事六十一年二月遷禮部員外郎五月授
監察御史巡視福建鹽政雍正五年遷大理寺卿

六年三月

命查浙江倉庫錢糧九月奏言臣清查黃岩縣倉庫後就
近察看鎮標之海門汛并對岸台協之前所汛原
設將弁防駐陸路並無哨船二處外即重洋內有
支港請增小快船數隻又海門至黃岩前所至台
郡每數里應增礮臺營房撥兵駐查凡沿河營汛

均照台州寺前橋例設哨船巡緝得

旨嘉允十一月授都察院左副都御史七年二月擢漕運
總督三月署浙江總督七月兼署杭州將軍八年
赴總漕任九月

上命將倉場侍郎岳爾岱總漕張大有議覆巡漕御史苗
壽等條奏漕船過淮陋規及敬陳管見兩摺交性
桂議奏尋議漕船陋規等款一幫船到淮原有津
貼費倘例外苛索私相授受經承計贓論罪旗丁

同究處一旗丁倩人造冊奸徒自名冊房串同派
費應禁革令本幫字識繕寫一過淮時運官親赴
盤糧廳投文吏役上號不許留難一漕臣盤驗米
色攪雜短少即應細責中軍官稽察行杖人役作
弊一江浙幫出鎮江口監梘從前催漕之員就便
查看未免多事應俟過淮日漕臣親驗揚州三岔
河係谷幫總匯選幹弁彈壓禁止恃強爭先一汎
地員弁不顧風色水勢混催漕船渡黃者議處疎

虞加等治罪一委宿遷營遊擊駐白洋河徐州營
副將駐臺莊八閘稽查弁兵于逆流添夫輓運不
得勒詐又議敬陳管見等款一旗丁造船每板薄
釘稀六七運便朽腐嗣後嚴飭糧道給足料價其
監造之衛守備及經胥等不得希圖陋規違式仍
督該丁賠造至漕臣親驗回空歸次領銀速修接
運旗丁以朽腐漕艘橫觸民船勒詐者革治一各
衛僉定正副二丁赴次交兌如革丁生監等竄入

即究運官失察容隱分別叅處疏入均如所請行
十年四月授刑部尚書七月調兵部九月復署漕
運總督十二月奏請截留漕糧四十萬石于蘓松
等處被灾州縣平糶又疏稱廬屬幫船雖隸江北
較之江寧等處更遠三百餘里又有大江之險原
定十二月過淮每致違限情實可原請改限正月
庶不遲悞領押弁員亦免叅處俱下部議從之十
一年正月回兵部尚書任六月

命同內閣學士雙喜往北路軍營協理軍需十三年七月

辦鄂爾坤糧餉事務八月調補吏部尚書乾隆元年仍留鄂爾坤尋患病來京調理

遣御醫診視三年十一月疏請休致得

旨卿才品優長簡任銓衡正資料理覽奏以老病求罷情辭懇切著以原官致仕十二年八月卒

賜祭葬如例謚恭簡

阿克敦

阿克敦滿洲正藍旗人姓章佳康熙四十八年進士改庶吉士五十一年授編修五十二年二月充河南鄉試副考官十月充

日講起居注官五十三年十二月

特旨阿克敦學問好前典試聲名亦好著授侍講學士五十五年轉侍讀學士五十六年九月朝鮮國王李焞病目遣使來購空青

命阿克敦齋

賜之十月充

經筵講官尋遷詹事府詹事五十七年十月擢內閣
學士六十一年四月朝鮮國王李昀請以其弟李
昫立為世弟

命阿克敦偕侍衛佛倫往封十月擢兵部右侍郎十一月
兼翰林院掌院學士時恭纂

聖祖仁皇帝實錄

命阿克敦為副總裁雍正元年三月

恩賜二品廕生四月充

日講起居注官七月

命專管翰林院掌院學士事尋充

四朝國史副總裁二年五月充

大清會典副總裁十一月充繙譯鄉試副考官十二
月

命偕散秩大臣舒魯封李吟為朝鮮國王三年二月充治
河方畧副總裁七月兼左副都御史十二月授禮

部左侍郎仍兼兵部侍郎四年三月充繙譯鄉試
副考官四月調兵部左侍郎兼國子監祭酒是月
兩廣總督孔毓珣請

陞見

上命阿克敦往署總督兼署廣州將軍福建汀州府八屬
例銷粵鹽毓珣奏准汀州府引課知府總其成歲
具印領自備鹽價水脚赴潮領運分發八縣協辦
銷售十二月阿克敦疏言汀州八屬雍正元年至

三年共未完課餉銀四萬九千四百二十八兩請
仍照前督臣楊琳所奏委官辦理發帑融銷以雍
正四年為始先完額引方輪舊引帶銷庶免新舊
混淆其未完銀勒限清部議如所請每年所銷鹽
餉銀除歸還水脚等項仍儘數解庫又疏言粵省
瀕海一帶盜賊出沒全賴左翼碣石二鎮總兵訓
練巡防方能安戢聞碣石總兵陳良弼秉心貪黷
凡漁船出口俱勒陋規拔補亦多索取左翼總兵

藍鳳令二子冒名補把總倚勢累兵似此劣員實不宜于重鎮得

旨據實上奏殊為可嘉現揀擇勝任之人爾即具本題叅可也初廣東巡撫楊文乾議將高要等五縣圍基頂衝改築石工次衝改作椿埽計費數十萬金借庫銀修築且有開捐之議阿克敦意與相左文乾專摺奏請五年正月阿克敦疏言查廣東沿江之高要高明四會三水南海五縣向有圍基俱係土工開

竇建牒以時蓄洩每年十一月後地方官督率鄉民按畝分工加卑培薄民不為苦官無所費至田畝間被淹圍基衝決多因江漲但水性不猛非必石工椿埽方能抵禦請仍循舊法令地方官農隙督民修補倘遇江水驟漲遣員巡查防衝決圍基即能保固毋庸改築費帑且無一勞永逸之理得旨所奏甚是尋請以廣州肇慶屬圍基專責廣南韶道肇高廉羅道督修與疏珣會疏以

聞下部議行廣西梧州府蒼梧縣之芋莢山產礦沙奸民聚黨偷挖經毓珣通緝未獲至是阿克敦嚴飭捕獲潘十八潭六等十四名皆有旗械為首之李亞展亦于陽江獲訊事

聞奉

諭此案朕時刻繫念今覽此事就緒甚為慰悅四月調吏部左侍郎六月署廣東巡撫八月疏劾肇高廉羅道王士俊侵歲羨銀千餘兩請徹底清查

諭

曰徹底清查固屬當然但王士俊尚屬有用之員當嚴加訓飭令其遷改九月署廣西巡撫十二月疏報廣西省雍正四年分民屯田共六十六頃四十五畝有奇應徵銀米水田于六年起科旱田于十年起科部議如所請先是文乾密叅阿克敦于廣南韶道林兆惠採買木廠被刦不嚴緝新會縣獲盜犯龍門營汛被刦軍器均屬令屬員審作竊賊從寬批結電白山聚盜多人白日沿刦匿不奏又侵蝕粵

海關火耗銀令家人索取暹羅國米船規禮銀請
查審嚴追又毓珣叅奏阿克敦侵蝕太平關火耗
銀並請查追六年六月

特旨阿克敦著革職交孔毓珣楊文乾審奏尋文乾卒八

月

上特遣通政使留保工部郎中喀爾吉善往會毓珣署廣

東巡撫傅泰嚴訊嗣留保等奏訊阿克敦稱盜犯
各案承審官審覆是竊非盜並未囑令寬辦又各

盜俱經嚴緝因失事未久旋即離署未具題粵海
太平兩關火耗銀舊規分作司事束修工食並非
侵隱至內地洋船無票者例繳船禮為雜項公用
船戶葉舜德係福建人非暹羅米船向有舊規實
非勒取但均未禁革願賠補等語阿克敦所供究
屬矯飾除諱盜侵耗輕罪不議外應坐令家人索
取暹羅米船規禮依律擬絞又因士俊前揭告阿
克敦袒護布政使官達婪贓不行查叅毓珣等遵

旨會訊定擬具奏並下部議斬監候七年十二月山東巡撫費金吾以疏濬濟寧嘉祥及江南徐州沛縣水道請派員督修

特旨原任侍郎阿克敦前在廣東任內尚無貪贓犯法等情著寬免釋放往河道工程効力以贖前愆九年七月上以準噶爾擾喀爾喀游牧

命撫遠大將軍馬爾賽由阿爾台進勦授阿克敦為內閣額外學士辦理撫遠大將軍印務十一年十二月

命阿克敦辦理扎克拜達里克糧餉十二年六月

召還七月西路北路將軍皆言兵力有餘賊勢窮蹙可進

討

上特遣阿克敦偕侍郎傅鼐副都統羅密往準噶爾

諭噶爾丹策凌以

寬大之恩開其迷誤畫清邊界不得踰越十三年四月回

京奏稱噶爾丹策凌請將哲爾格西喇呼魯蘓為

我喀爾喀游牧地界

上以阿克敦等奏摺併地圖密寄北路副將軍策凌詳悉
定議尋策凌議奏往者喀爾喀游牧尚未至哲爾
格西喇呼魯蘓應如所請行至彼處厄魯特游牧
必以阿爾台山嶺為界若游牧逼近防守實難斷
勿令過山嶺

上從其議閏四月署鑲藍旗滿洲副都統五月署工部右
侍郎八月充八旗通志副總裁九月

命守護

泰陵乾隆元年

恩賜二品廕生二年閏九月管理

泰陵工部事務三年正月噶爾丹策凌遣使求策凌轉奏

喀爾喀與厄魯特以阿爾台山嶺為界俱照現在

駐牧

上以其詞恭順

命阿克敦為正使偕副使侍衛旺扎爾台吉額默根齋

敕往

諭議定地界十二月阿克敦等率噶爾丹策凌來使哈
柳自準噶爾回京奏稱噶爾丹策凌令議定界請
循布延圖河南以博爾濟昂吉勒圖烏可克嶺噶
克察為界北以孫多爾庫奎多爾多輝庫奎至哈
爾奇喇博木喀喇巴爾楚克為界彼處之厄魯特
毋踰阿爾台山嶺喀爾喀亦祇于扎布堪游牧相
距遼遠庶可兩無牽掣又請進藏煎茶并懇貿易
上以噶爾丹策凌既遵

旨定界嗣後近邊居人各安故土更無爭競

允其進藏煎茶貿易事

欽派大臣與來使哈柳議行是年授工部右侍郎四年

七月轉左侍郎八月充繙譯會試副考官十二月

充一統志副總裁五年三月調刑部右侍郎尋轉

左四月教習庶吉士閏六月調吏部左侍郎七月

充

經筵講官六年四月協辦步軍統領刑名事務七年

三月署正白旗漢軍都統八年六月授鑲藍旗滿洲都統十年三月充會試正考官五月充

五朝國史副總裁兼翰林院掌院學士六月充

日講起居注官十一年閏三月擢左都御史兼議政處行走五月授刑部尚書十二年八月充順天鄉試正考官十三年正月

命協辦大學士事務四月奉

旨不必協辦是月翰林院奏進

旨此非無心之過文意不通可比且此文留中欲細覽

交出及看出大不敬背謬之處欲傳旨詢問則阿克敦等皆散去此皆阿克敦因前日解其協辦大學士之故心懷怨望且伊于

皇考時獲罪起用朕洊用至尚書數年來實無出衆宣猷之處而每以文學老成自命不得陞用輒懷怏怏阿克敦著草職交刑部治罪部議以阿克敦怨望大不

敬依律擬斬監候六月奉

旨阿克敦著照革職留任之例在內閣學士上行走効力贖罪仍署工部侍郎事務閏七月

上諭刑部事務緊要滿洲尚書員缺朕于各部侍郎內詳悉評量或才堪辦事而踐歷未久或才力未充而統率非宜一時未得其人阿克敦前雖獲罪尚係舊人且其獲罪不因辦理部務錯謬尚可棄瑕錄用著署刑部尚書是月即以原銜充

經筵講官協辦步軍統領衙門刑名事務授鑲白旗
漢軍都統九月充會典館總裁又充清漢篆文副
總裁十月兼翰林院掌院事務充

日講起居注官十二月協辦大學士充

國史館總裁十四年二月以金川平加中外在事諸
臣秩

諭曰阿克敦久膺委任歷著清勤宜一體加恩以昭風
勸著加太子少保七月

上幸木蘭

命留京辦事兼署步軍統領十月

賜紫禁城騎馬十二月

賜御書協中輔治額十五年七月

上巡幸河南

命留京辦事九月兼署左都御史十六年正月署步軍

統領十九年四月

上以阿克敦七十壽辰

賜御書贊元錫嘏額五月

上幸

盛京

命留京辦事二十年正月以目疾請假

上允之

遣太醫診視復經屢次陳情

命以原官致仕二十一年正月卒遺疏上得

旨阿克敦簡任中外宣力有年上年因患目疾特予致

仕俾得安養冀其痊愈今聞溘逝深為軫惻遣散秩
大臣率同侍衛往奠茶酒賞銀一千兩辦理喪事應
得卹典察例具奏尋

賜祭葬如例謚文勤子阿桂現任大學士以軍功封一
等誠謀英勇公

諾岷

諾岷姓納喇滿洲正藍旗人先世居輝發祖恩國
泰以習漢書應天聰八年禮部試

賜舉人崇德元年入內秘書院辦事順治元年授禮部理事官八年擢禮部侍郎游陟本部尚書十三年四月

上以六部堂官不能實心辦理各予降革恩國泰于典禮未協降三級留任十五年十二月罷康熙八年八月復任工部尚書尋調禮部十年正月以原品致仕十二年九月卒

子祭葬如例父那敏康熙十八年授三等待衛二十四年

授佐領雍正二年授額外副都統尋署鑲白旗事
五月授正白旗滿洲副都統六月遷鑲黃旗滿洲
都統十一年八月卒諾岷由筆帖式授戶部主事
遷本部員外郎中雍正元年三月擢內閣學士兼
署工部侍郎四月授山西巡撫七月疏言山西連
遭荒歉兼以虧空纍纍臣奉

命賑恤饑饉查補虧空但州縣任非其人恐民困方甦者
又致擾累錢糧方清者復被挪移請

勅部揀選賢能官二十員發晉補用九月又請揀發三十

員俱蒙

俞允十二月疏言州縣錢糧屢經盤查一時難窮底裡現
查出虧空尤甚者指名叅奏其餘各州縣須通行
調任令將倉庫互相盤查方能徹底澄清又言前
任巡撫德音叅奏無抵虧空各員均革職留任奈
不行完補益增虧空應同現查出虧空各員請革
職者一併勒令離任嚴審查追俱如所請行又疏

言山西各營官兵不敷月糧例係折給自行採買
奈連歲歉收今夏米價更昂應照時價酌議夏秋
二季米價太原蒲州大同各營每石折給銀一兩
二錢平陽汾州各營一兩五錢右衛殺虎口各營
一兩一錢暫增數月糧價官民大有裨益部議駁
特旨允行二年三月疏言太原平陽二府所轄州縣居通
省三分之二地方遼濶經年不能周其地是以從
前虧空知府毫無覺察今細察輿圖莫若照直隸

州之制分轄請將太原府屬之樂平盂縣壽陽分
隸平定州定襄靜樂分隸忻州五臺崞縣繁峙分
隸代州河曲興縣分隸保德州平陽府屬之臨晉
榮河萬泉猗氏分隸蒲州安邑夏縣平陸芮城垣
曲分隸解州太平襄陵稷山河津分隸絳州蒲縣
鄉寧分隸吉州大寧汾西永和分隸隰州一經分
理則太原平陽所隸州縣各止十一地近則易周
糧少則易核不惟虧空之弊可杜即刑名詞訟亦

簡而易理至直隸州各有倉庫向無專責恐致侵
挪請將蒲州解州吉州絳州隰州錢糧就近令河
東道盤查平定忻州代州保德州錢糧令雁平道
盤查其舊設之澤州遼州沁州錢糧令糧驛道盤
查如通同隱匿失察照議處知府例處分又言山
西掌印都司專督屯糧兼轄衛所今衛所議裁錢
糧刑名原屬布按二司兼理請將該都司首領經
歷裁汰均如所請行直省各官向無養廉州縣俱

徵收火耗藉資日用上司所需即取給州縣貪吏
以此藉口上司曲為容隱弊竇滋多至是諾岷奏
請將山西一年所得耗銀提解司庫除抵補無著
虧空外分給各官養廉而山西布政使高成齡復
請倣山西之例通行直省

上以剔除積弊必更定法制耗羨必宜歸公養廉須有定
額

詔總理王大臣九卿集議會各省皆以次奏請議遂定是

舉也

上獨申睿斷因時制宜創行萬世良法以諾岷首發其議
諭獎其通權達變于國計民生均有裨益三年正月以病
乞假

命解任回旗調理先是貝子允禳以罪發往西寧其眷屬
過山西從人擅毆生員諾岷奏請提審并請將貝
子允禳

勅交宗人府嚴察治罪後任巡撫伊都立審奏貝子允禳

護衛烏雅圖等在平定州擅毆生員應請按律治
罪得

旨此案內有太監李大成為允禔首領太監豈有不知此
事之理諾岷審時以李大成患病竟為脫卸遽行發回
諾岷係滿都護屬下之人滿都護與允禔比隣而居原
屬同黨似有瞻徇強為掩飾諾岷大負朕恩伊都立疎
忽殊甚仍著伊都立將李大成審出實情具奏嗣經伊
都立嚴審李大成毆生員事屬實前審時李大成

諉以患病不知諾岷即未曾根究其贍狗開脫屬實請交部嚴加議處部議革職十二年九月卒

蘓昌

蘓昌滿洲正藍旗人姓伊爾根覺羅祖滿丕官都統有傳父蘓保襲雲騎尉康熙五十九年蘓昌由監生考取內閣中書雍正七年遷侍讀十二年遷浙江道監察御史乾隆元年

命巡察吉林等處二年七月奏請于黑龍江船廠各設

理事通判得

旨允行又言船廠將軍衙門及所屬寧古塔三姓白都
訥阿爾楚喀刑名案件向俱船廠理刑司審理皆
本處旗員通清漢文諳律例者甚少審擬罪名多
與律例不符輾轉駁詰案內干連人犯監禁日久
非慎重刑名之意請揀在京員外郎主事各一筆
帖式二往辦事

詔下部議船廠旗民詞訟有通判專管其理刑司員外

郎無庸增惟主事由京選補筆帖式由該處選補
三年襲世管佐領尋轉禮科給事中四年巡視西
城六年正月署廣西按察使七月調署安徽按察
使七年實授十年五月丁憂回旗仍在御史上行
走十二月補工科給事中十一年正月擢奉天府
府尹六月奉天各屬被水蘓昌條奏辦賑三事一
奉天向來辦賑因乏公項腳價無出並不于四鄉
設廠各屬幅輳遼濶村民赴城領賑往返數百里

情殊可憫請照例分貯米石于四鄉適中之地脚
價動正項核銷一辦賑胥吏飯食紙筆之費因無
項可動不無賠墊請酌州縣大小定其名數按日
給費令不得藉口需索一委員勘災監賑酌給盤
費並跟役飯食倘有通同侵欺等弊嚴叅治罪

諭曰所議尚屬可行而實力稽查妥協辦理則汝一人
之責也勉之九月奏清查游民三事一山海關迤北
至喜峯口一帶邊牆缺處游民冒險繞越請咨直

隸總督古北口提督巡防奉天沿西一帶交錦州
副都統率該府加謹巡查一內地游民出古北喜
峯等口由八溝塔子溝繞入奉天境內請令總督
提督轉飭塔子溝通判河屯協副將實力巡查一
奉天之南金復雄蓋四城與山東登萊二府相對
商帆私載民人勢所不免奉天甲丁散居屯莊輪
班赴城供差似難坐守海濱各口又無墩堡請飭
商船俱于有官兵處停泊上岫以便稽查如無引

票即遞回原籍下部議行十四年擢廣東巡撫十六年署兩廣總督初廣西巡撫舒輅奏于思陵土州沿邊種笏竹以杜私越嗣土目頭人等乘勢侵夷地夷人不甘土目遽以夷人拔竹毀牆捏報蘓昌檄道府查明押令頭人歸所侵地因奏言鎮安太平南寧等府沿邊二千餘里處處界連交趾無論種竹難徧設辦理稍疎必致轉滋事端請通查及早更正疏入

上以舒輅輕率舉行下部察議又奏言廣東承辦楠木
案內各員核減長支銀三萬六千八百兩有奇前
經奏明勒追不能完者各上司分賠但分賠人員
有無從著追者請再均派攤賠

諭曰蘓昌此奏非是分賠之例原專為侵貪之員虧蝕
正帑上司不早為覺察是以責令分賠以專其責成
耳核減長支已非侵貪可比即謂其不能實力稽查
估報不行核實亦應令賠所應賠本分而止若又將

同賠案內他人應賠之分均攤代賠於情理殊未允
協且既有他人攤賠將併應賠之員俱稱無力完繳
徒使案牘紛煩輾轉攤派徒失政體而亦毫無裨益
前因粵西張永燾一案曾經明晰曉諭今蘓昌仍有
此奏或他省尚有似此辦理者著通行傳諭知之十
八年正月以協拏增城逆匪王亮臣不力

諭停其議叙八月奏言瓊州為海外瘠區貧民生計維
艱查有可墾荒地二百五十餘頃請招民開墾免

其陞科

詔如所請十一月

命來京候旨十九年授吏部侍郎二十年署戶部侍郎
二十二年兼署工部侍郎二十四年正月署工部
尚書九月授湖廣總督二十五年疏言辰州協兵
每月額支米三斗每石折銀六錢前經總督孫嘉
淦以六錢不能買一石題准將停運黔米二萬石
派給提標等十四標營辰州協每兵得米一石四

斗又每秋預給來年一季米銀餘仍支折色自行
買食查辰州逼苗疆山多田少米價素昂兵丁歲
支米一石四斗及預給一季米銀僅供半年口糧
其餘額支折色銀每斗六分一月之銀不敷半月
之米請借朋扣銀一千五百兩差員往常德買運
存俟次年本色支完後按月搭放照原買價於餉
銀內扣還仍將此銀永遠存留按年買運源源接
濟得

旨如所議行時在籍御史孫紹基指稱與臬司沈作朋
同官撞騙婪贓蘓昌叅奏抵罪並請

勅部嚴定回籍之員與督撫有司彼此交接處分部議
均定為降三級調用二十六年四月疏言湖北徵
收漕耗除支給旗丁食米餘俱照時價易銀撥充
咸寧等縣不敷水脚及養廉公用查各官養廉現
有額定耗羨稅銀十五萬有盈無縮其不敷水脚
亦有各屬所剩水脚銀六十餘兩撥給不須此項

耗米變價湖北通省額穀僅五十二萬餘石續又
增買賑穀四十萬石較他省為少且界連江浙每
多撥運協濟若將此項耗米存貯各州縣附入常
平額穀內則通省歲可增二萬七千石倉貯漸裕
詔如所請是月蘓昌密叅巡撫周琬情性乖張奏事多
倒提年月揜飾已過

上調蘓昌為兩廣總督

命新任湖廣總督愛必達秉公體察愛必達尋奏琬遇

事偏執有意與蘓昌掣肘並匿灾徇庇劣員

詔革職赴巴里坤効力二十七年疏言潮州溪河經海陽揭陽普寧三縣為閩粵衝衢奸匪剽掠為害請於海陽縣屬之蠻門山揭陽縣屬之方坑楓口竹橋各設一汛兵八名以四名防汛四名配船查緝並撥原防普寧縣外委一員移駐適中之楓口汛往來督巡下部議行二十八年七月疏叅碣石鎮總兵王陳榮貪黷敗檢得

旨革職論罪如律十月加太子太保二十九年正月疏
言廣東社倉穀前經督臣李侍堯等酌議額貯在
五千石以上者所餘息穀照廣西例變價解貯備
賑不及五千者餘息併入額穀內部議准行臣查
廣東社穀捐自民間與廣西出自常平餘息者不
同且廣東產米不敷民食社穀自宜多貯以補常
平不足若因額貯過多即將息穀變價遇歲歉再
買給賑是糶於穀賤之時而糶於穀貴之日一石

原價不能得五六斗現糧且赴司領銀往市易穀
跋涉實多未便請嗣後息穀不拘額數統存州縣
備賑免其變價解繳庶積穀日充

詔如所請六月調閩浙總督先是蘓昌以廣東鹽運使
王槩列計典卓薦而槩於署糧道任內浮收倉穀
虧帑婪贓至是為廣東巡撫明山所劾御史羅暹
春因劾蘓昌在粵年久不能及早舉發非年老糊
塗即有意瞻徇況近在同城豈真一無見聞不劾

反舉不公不明豈復堪節制海疆

諭曰此奏是失察之咎蘓昌實不能辭至節制海疆乃出自朕簡用非御史所當言羅暹春著飭行蘇昌明白回奏八月

諭曰前御史羅暹春叅劾蘓昌保舉運使王際一摺在蘓昌於屬員虧帑既漫無覺察又登之卓薦自有應得之咎言官據實指叅乃職所應爾是以批諭發京初不以為非是特其摺內有若非年老糊塗即屬有

意瞻徇措詞忿激幾於唾罵其意若有必欲甘心於
蘇昌者踪跡殊為可怪昨閱刑部審擬廣東叅革知
縣劉紹汜一摺該犯即係與羅遲春江西同鄉而蘇
昌又即叅處該犯之總督其為藉詞潛行報復實啟
黨援朋比之風不可不悉心體究創懲以防流弊因
諭刑部堂官悉心查訊今據奏到羅遲春與劉紹汜
雖無瞻徇實跡然該御史具摺叅劾不即于蘇昌失
察原案發抄之時又不於劉紹汜審擬已經定案之

後該御史亦自稱形跡之間百喙莫辯等語此等以鄉情各酬私怨其事本無實証豈對簿駁詰遽肯輸情吐露然亦不值因此即革職審問也封疆大吏果有罔上行私確據臺垣自應據實糾彈顧立言亦自有體中外大臣皆經朕簡用苟其事不干大戾即朕亦不遽加以斥罵御史雖欲自著風力亦豈得以年老大臣盡斥之為糊塗且前如來保今如尹繼善傅森陳宏謀諸臣屢經駁歷其齒安得不老而生平奉

職無愆豈遂一例槩以衰庸肆為詆訕可乎明季科
道惡習立幟分門借敢言之號行傾險之謀假公濟
私無所不至為害甚大我朝百餘年來整綱飭紀朝
政肅清斷不容有營私搏擊之人復得稍萌故智但
過邪防弊持之不可不堅今羅暹春之奏其為劉紹
汜而發本非有証佐可質而任意詬毀已情見乎詞
且不先不後之間自供亦無容置喙此而陽為不知
於人心政事所關非細羅暹春著交部嚴加議處是

月蘇昌覆奏自請嚴議並下部議得

旨蘇昌降五級從寬留任羅暹春從寬免革職加恩以主事用三十年

上南巡

御製詩賜之曰楚粵曾宣績浙閩茲撫封外中久敷歷聲望益春容早是心如水應知壽比松自當隨蹕輦奕葉本從龍三十一年臺灣淡水廳屬鱟壳莊民為生番焚殺五十餘人同知李浚原詳報不實蘇昌

叅奏革職檄按察使余文儀往會臺灣鎮派兵嚴緝並條奏安戰事宜五款一逼近番界之零星住戶悉遷附大莊一民莊酌撥弁兵移駐捍衛一近山各莊建望樓嚴守望一禁墾界外荒埔免越界滋衅一清查熟番產業民人不得侵佔得

旨如所議行三十三年來京

陞見

命在紫禁城內騎馬尋卒

賜祭葬如例諡愍勤子富綱現任雲貴總督

明山

明山滿洲正藍旗人姓伊爾根覺羅雍正五年由
閑散襲佐領遷叅領緣事革職乾隆十九年

詔給主事銜在軍機處行走旋補戶部主事遷員外郎

二十年署甘肅寧夏道二十二年遷山西按察使

二十四年正月遷浙江布政使二十五年奏嚴禁

窩賭二條一拿獲賭博應將造賣賭具者追出治

罪查雍正十三年刑部議准湖南巡撫鍾保條奏
賭博案內不將造賣人供出即將買有賭具之犯
照販賣賭具為從例杖一百徒三年後律例館改
照不應重律杖八十定例既輕犯者益衆請仍照
原例問擬杖徒一窩賭必有聚賭之人往來兩隣
無不悉知嗣後如有經旬累月開場窩賭者許左
右隣舉首照例給賞徇隱照不應重律杖八十若
得財准竊盜計贓從重論部議允行二十六年丁

母憂仍在軍機處行走二十七年五月署江西巡撫八月授廣東巡撫九月疏請禁印官蟒衣跪迎督撫

上是之部議允行十月疏言臣自江西起程聞浙江被水將來米價必昂江西本年米價甚平陳陳相因請

勅江西浙江撫臣酌量情形如需接濟卽碾撥江西常平穀二三十萬石運浙江民食有資江西又可

收出陳入新之益得

旨嘉獎二十八年正月奏言廣東府廳貯穀前撫臣鶴
年奏令附近州縣碾放春夏兵米秋後徵收還倉
查廣州通判倉貯穀八萬二千七百八十餘石歲
撥南海番禺東莞順德新會香山增城清遠八縣
兵米僅六千二百石十三年始出易一週粵地潮
濕久貯黴耗堪虞請自乾隆癸未年始除增城清
遠二小縣仍照舊數碾放其南海番禺東莞順德

四縣每年各加撥千石新會香山二縣每年各加撥六百石連原撥數共出陳穀萬一千四百石七年即可全數易新

詔如所請行六月調陝西巡撫十一月復調廣東巡撫先是鹽運使王槩署糧道浮收兵米折銀萬餘兩入已各埠虧餉銀檄運同保成往查槩向保成跪求保全總督蘇昌明山兄也未行叅劾明山莅任奏請革任

諭曰此奏可嘉之至蘇昌竟為其所愚而汝不顧弟兄
私情即行叅奏不負朕任用之恩矣勉之槩尋擬罪
如律三十年閏二月調江西巡撫暫留署兩廣總
督六月奏言崖州僻處海島產穀素少額貯穀五
千三百七十八石有奇額外穀一千一百七十四
石有奇連年碾放兵米所存無幾查高州府電白
縣有溢額穀七千餘石與崖州連近請撥運五千
石與崖州額貯穀額外穀共一萬一千五百五十

二石餘為定額歸善縣額貯穀十一萬餘石為數甚多上年平糶尚有應買補穀價請截六千一百七十四石二斗六升價銀批解充餉即以抵崖州加貯額部議從之三十二年二月調西安巡撫三十三年十二月擢陝甘總督三十四年十一月以成縣知縣湯尚箴縱役索詐滋事不早糾叅部議革職

諭曰明山著革職從寬留任十一月以烏什換班兵所

乘用馬明山不照定例咨新疆大臣交原領兵收放遽令入新收項下

上以所奏取巧交部嚴議部議革任

詔免之三十六年五月以前調任江西巡撫時令首縣修改衙署事發

諭曰前據高晉查審知府李枝昌一案內有墊用前任巡撫明山修理書房銀兩之事因令該督撫秉公確查並令明山明白回奏旋據明山覆奏彼時因書房

窄狹折去截板所費不過十餘金俱係隨時發價而所需工匠不得不令首縣代催因自請交部議處朕以明山所奏如果屬實尚不致有干吏議而其事既係首縣承辦無難澈底根查因交高晉一併查明具奏今據高晉奏查明山於廣東調任江西時即先行札飭中軍傳諭南新兩縣修改衙署所費約五百餘金現有印封原札可據呈覽與伊回奏所稱無涉等語實出情理之外明山不應如此督撫到任修理衙

署令首縣代辦亦事所常有但不當以累及屬員即
或發價稍遲其罪亦小乃經傳旨詢問並不據實直
陳輒敢托詞捏覆希冀朦混封疆大臣為朕所倚任
顧可心存欺隱乎且小事如此則何事不可為大事
尚足信乎明山著交部嚴加議處復

諭曰明山現在交部嚴加議處伊係革職留任之員部
議自應革任向來督撫遇此等處分或事屬公過或
情尚可原每以人材難得酌量加恩仍予留任今明

山於覆奏衙署一事敢於欺飾朦混其心已不可信
且其近日辦事動輒舛錯頓不如從前之精到亦既
屢令軍機大臣嚴飭矣然人材難得尚望其改過自
新今竟敢為欺飾若此豈可復膺封疆重寄明山著
即解任聽候部議尋議革任三十七年三月授副都

統

命為烏魯木齊領隊大臣疏言烏魯木齊增駐滿兵三
千於城西北建官署兵房由內地撥綠旗兵千五

百乘春建造備今秋滿兵移駐但計程綠旗兵四月方到工而滿兵今秋出口即需住房臣酌撥烏魯木齊差屯兵二百先行工作俟內地兵到接辦修市肆百間收租備

恩賞暨公用移涼州理事同知駐烏魯木齊新城以資彈壓從之四十四年九月卒子海寧官至浙江巡撫五十五年十月卒

諭照總督例給予卹典

賜祭葬諡勤毅



欽定八旗通志卷一百七十七

欽定四庫全書

史部

欽定八旗通志卷

一百七十八至
一百七十九

欽定四庫全書

欽定八旗通志卷一百七十八

人物志五十八

大臣傳四十四

滿洲鑲藍旗一
三泰 喀三

安費揚古
沙爾瑚達

穆克
固

坦

武巴海
愛音塔穆

舒賽
都爾德

瑚什布

席特庫

巴泰

安費揚古

子達爾岱

安費揚古姓覺爾察世居瑚濟寨後隸滿洲鑲藍

旗父完布祿事

太祖高皇帝章嘉及尼瑪蘭二族誘之叛不從又劫其孫
以要之終無貳志安費揚古自少從

太祖征伐癸未年八月

太祖以薩爾訥城長諾密納陰附尼堪外蘭執而誅之

命安費揚古帥兵取其城兆嘉城長理岱蘓哈達兵劫瑚

濟寨既去安費揚古方獵聞之帥十三人疾追斬

四十人盡獲所掠以歸甲申年正月從征兆嘉城

獲李岱其黨理固哩扎親走附旺泰奉

命往招並旺泰降之六月從征瑪爾墩寨寨踞山巔進攻
三日矢石交下不能克安費揚古夜帥兵從間路
攀崖上拔之丁亥年六月

太祖征哲陳部八月征洞城明年九月征完顏城皆從尋
攻克章嘉尼瑪蘭赫徹穆等城又取香潭寨其長
理敦拜瑚遁追及於碩郭之陽擒以獻癸巳年六
月從征哈達克其富勒佳齊寨師還

太祖親殿敵潛躡焉有數駑突前勢甚急安費揚古遮擊

皆斬之九月隨大軍擊敗葉赫等九國兵閏十一月同額亦都等討訥殷部克佛多和山寨斬其長數穩色克什己亥年九月從

太祖滅哈達辛亥年七月奉

命征東海窩集部與台吉阿巴泰等取烏爾固宸穆稜二路癸丑年正月

太祖征烏拉安費揚古帥師薄城執大纛先登天命元年同扈爾漢征薩哈連部至烏勒簡河取河南北諸

寨八月師次黑龍江江水常以九月始冰是時中
流忽結冰若浮梁約廣六十步安費揚古曰此天
佑我

國也策騎先涉衆從之遂取江北十一寨復招服使
犬諾囉錫喇忻諸部三年四月大軍下撫順明總
兵張承蔭等赴援分營為三安費揚古擊其左營
大破之復同額亦都攻克馬哈丹花豹衝三岔兒
諸堡四年破明經畧楊錫兵滅葉赫六年取瀋陽

遼陽安費揚古皆在事有功

太祖常嘉其鷙勇

賜號碩翁科囉巴圖魯

命為一等大臣佐理國事居五大臣之列七年七月卒年六十有四順治時追諡敏壯子八人第六子曰達爾岱天總五年任鑲藍旗叅領從征大凌河守臧家堡崇德時從征朝鮮攻明錦州寧遠皆有功順治二年授雲騎尉世職七年以追叙安費揚古功

晉職一等輕車都尉世襲固替康熙五十二年

聖祖仁皇帝念安費揚古為開國勲臣復

賜三等輕車都尉世職令其裔孫明岱分襲焉

固三泰 子明阿圖孫賽弼翰

固三泰姓納喇葉赫貝勒錦台什同族

太祖高皇帝時率屬來歸隸滿洲鑲藍旗任佐領尚公主

封固倫額駙從大軍征明廣寧單騎入敵陣身被

數創戰愈力大軍繼之遂敗敵兵優加男爵

太宗文皇帝御極設八大臣以固三泰為鑲藍旗都統天聰元年三月隨大貝勒阿敏征朝鮮有功四月凱旋

上郊勞之優以殊禮三年

上親統大軍征明攻遵化固三泰率本旗兵於城西南隅攻克之明年大軍取永平明兵潰走昌黎

上遣教漢奈曼巴林扎魯特兵攻其城不克

命固三泰同都統達爾漢等率兵往助尋遣人以城守堅

還奏奉

諭撤兵因焚其近城廬舍而還復受

上方畧征灤州先令叅領高鴻中庫爾禪率十人誘敵啟
門大軍遂入城籍其倉庫銀穀以

聞五年

上幸文館閱館臣達海所譯武經因

諭羣臣曰古來為將帥者必體恤士卒朕聞額駙固三泰
與敵交鋒士卒有戰死者嘗以繩繫其足曳歸輕蔑士

卒若此何以得其死力乎尋以固三秦不能鈴束士卒

不諳機務

命解都統任九年

詔免功臣徭役固三秦與馬並增

賜人戶俾專管佐領事

世祖章皇帝定鼎燕京

加恩優賚尋卒子明阿圖初任佐領大軍入關時明阿圖

署副都統督兵殿後有功順治二年授雲騎尉世

職任都察院理事官四年考滿晉騎都尉六年授
鑲藍旗蒙古副都統兩遇

恩詔晉三等輕車都尉八年二月卒長子關柱襲職次子
賽弼翰初為簡親王濟度護衛

聖祖仁皇帝康熙四年授護軍叅領十三年隨護軍統領
瑚里布討逆藩吳三桂由陝西進四川攻克陽平
關及朝天關趨保寧叛鎮吳之茂王輔臣糾賊阻
饗道乃退駐西安十四年隨瑚里布攻復秦州十

五年王輔臣降師旋賽弼翰得

優賚十七年海賊鄭錦犯福建陷海澄長泰

詔增遣八旗兵赴福建以賽弼翰為營長同諸叅領率之

往十八年賊將劉國軒吳淑何祐等犯漳州結壘

郭塘歐溪頭來奪江東橋賽弼翰隨平南將軍賚

塔進戰連挫賊衆毀其壘殲殪無算二十年隨賚

塔由廣西征雲南討逆賊吳世璠敗賊將何繼祖

等于石門坎黃草壩遂會四川貴州兩路兵平定

雲南二十三年擢蒙古鑲藍旗副都統二十四年
調本旗滿洲副都統二十五年叙功授騎都尉世
職二十九年十一月卒

予祭葬如典禮子伊增額襲職

喀山

子納海

喀山姓納喇世居葉赫部之蘓完當葉赫未滅時
孥家屬來歸隸滿洲鑲藍旗

太祖高皇帝以其才可用授佐領屢從征明取瀋陽遼陽

並有功予三等輕車都尉世職天命九年明總兵
毛文龍以守備二員率兵百人來奪額駙康果禮
叱莊喀山領所部禦擊斬二守備殲其衆

太宗文皇帝天聰六年從征察哈爾同前鋒統領勞薩叅
領吳拜等率精銳先驅察哈爾林丹汗竄遁八年
追叙禦擊毛文龍部衆功晉爵三等男時以目失
明辭佐領任順治二年

世祖章皇帝念其舊勞晉爵一等男三遇

恩詔晉二等子十二年十月卒

賜祭葬立碑謚曰敏壯子納海初以喀山病目

命代管佐領事旋授前鋒叅領天聰八年從征明大同與
前鋒叅領席特庫等率四十人擊敗陽和敵騎斬
級二百獲馬六十餘復設伏宣府擒敵哨騎九年
大軍復征大同納海奉

命率兵駐上都城舊址偵軍事迎奏捷使以偕還尋同叅
領鄂莫克圖等齎書

諭明喜峰口潘家口董家口諸守將及還斬邊界哨卒百餘俘一人崇德二年同席特庫齋書

諭明總兵祖大壽自廣寧入邊擒哨卒十二斬其九縱二人使齋

諭至錦州以一人歸四年隨武英郡王阿濟格征明錦州以攻克臺堡及俘獲之數還奏旋從

上征松山明兵出城迎戰擊卻之祖大壽遣援兵自寧遠乘船趨杏山將入城納海同前鋒叅領瑚密色索

渾率兵衝擊其後斬五十人獲甲四十及船一旋
與瑚密色等自松山畧杏山獲牛三十九羊三百
餘復同前鋒統領席特庫畧錦州郊外擒斫木燒
炭者二十二人獲馬羸牛無算五年大軍圍錦州
敵出城築臺納海同前鋒叅領色赫布丹蘓爾德
馳擊斬四十人復追斬出城刈草者四十二人敵
以三百騎一再來犯並擊之遁尋與色赫等往小
凌河遇祖大壽所遣蒙古十七人自錦州至皆斬

之六年明總督洪承疇集援兵次松山納海同前
鋒統領吳拜擊敗其騎兵

上統師親征圍松山城敵犯我前鋒汎地納海偕諸叅領
合擊卻敵既而敵兵自杏山走塔山納海率衆邀
擊追至筆架山斬首四百奪纛六生擒二十八人
獲馬二百餘七年錦州下叙功予雲騎尉世職是
年冬署前鋒統領隨貝勒阿巴泰征明自黃崖口
入長城趨薊州擊敗明總兵白騰蛟白廣恩迎戰

兵遂進征山東明年凱旋以不俟左翼軍先出邊
右翼諸將並停叙功後三遇

恩詔晉世職至三等輕車都尉及喀山卒以二等子爵予
納海併襲晉為二等伯順治十七年二月卒弟納
秦襲

沙爾瑚達

沙爾瑚達姓瓜勒佳其先蘓完人世居呼爾哈

太祖高皇帝時從其父桂勒赫來歸任佐領後隸滿洲鑲

藍旗天命初從征瓦爾喀部有功授騎都尉世職
天聰元年明人於錦州大凌河築城屯田

太宗文皇帝自將擊之既至大凌河明人棄城走大軍遂

圍錦州沙爾瑚達時任前鋒叅領累戰皆捷三年
大軍征明入紅山口拔遵化州抵北京沙爾瑚達
敗其郭外兵論功授三等輕車都尉世職自是數
奉

命同前鋒叅領勞薩等率遊騎入明邊往來錦州松山杏

山間俘繫明謀卒凡擒哨長一獲邊卒十八牲畜
器械甚夥大凌河之捷也明總兵祖大壽降請歸
錦州為內應既而背其言八年

上於行營遣大臣畧地至錦州且遺書大壽恐不能達

召沙爾瑚達

親授方畧令襲取守烽堠卒付以

勅書如無所獲即懸書十三站山坡沙爾瑚達輕騎往未
遇敵懸書而歸九年與步軍統領巴奇蘭等征黑

龍江以功加一雲騎尉時貝勒多鐸率師征明錦州遇祖大壽部將劉應選等於大凌河曲

上以多鐸所將兵少令沙爾瑚達及各旗大臣扎福尼等往濟其軍會多鐸已擊敗明兵遂班師是年冬赴錦州偵軍事還獻俘獲

命即以分賚將士崇德元年從征朝鮮率兵敗敵於南漢山城二年列議政大臣

上以叅領丹岱阿爾津等往土默特貿易慮明兵於中途

截擊

遣沙爾瑚達率將校往歸化城護之三年與前鋒統領吳拜率兵八十人至紅山口遇明兵斬其裨將二擊走羅文峪騎兵五百奪其纛獲馬四十又殲密雲步兵百餘四年

上統軍征明沙爾瑚達率前鋒兵趨義州復至錦州捕伐薪為炭者取其牲畜猝遇敵卒敗之尋率土默特部卒二百人入寧遠北界與叅領蘓爾德鄂碩布

丹先設伏以數騎誘敵敵堅壁不出乃擒其樵採者以歸五年叙功晉二等輕車都尉六年三月隨睿親王多爾袞圍錦州以離城遠駐下部議罪應革職籍家產半

上特宥之令罰鍰八月擢前鋒統領

上以累歲用師錦州未克遣將更番圍之明人分道赴援

屯師松山

上親征部分諸將擊敵

賜沙爾瑚達馬使率兵營於高橋東界

誠之曰爾素日行不逮言今日之役當思自勉復

諭曰如敵兵敗可於杏山西臺橫截大路躡擊之毋使入城及戰明兵遁沙爾瑚達達

命弗追擊縱潰卒二百餘入城

上繫而問之曰汝何辭稽首對曰殺臣祇一死耳宥臣當效命疆場乃

赦之罷前鋒統領及議政俾任叅領立功自贖七年呼爾

哈部煽亂沙爾瑚達受

詔與葉赫珠瑪喇討平之招降喀爾喀木等十屯人戶千餘獲馬羸牲畜無算凱還

賜宴及布帛有差

世祖章帝順治元年沙爾瑚達征庫爾喀及黑龍江皆
有功復隨大軍追擊流賊李自成於潼關明年隨
貝勒博洛攻取江寧進師杭州所在力戰三年論
功晉一等輕車都尉四年授副都統駐守東昌時

充東賊渠丁維岳張堯中攻陷州郡撫臣張儒秀
告急沙爾瑚達馳軍進勦大破賊衆陣斬渠魁東
郡以平加一雲騎尉五年江西總兵金聲桓據南
昌叛沙爾瑚達隨大軍征討有功遷護軍統領復
為議政大臣六年河間賊竊發奉

命率兵勦撫賊黨解散明年改任鑲藍旗滿洲副都統晉
爵三等男累遇

恩詔晉一等男兼一雲騎尉九年正月

金史卷一百七十八
上以吏部於兩次

恩詔加秩過濫削去沙爾瑚達一雲騎尉七月奉

詔統率官兵駐防寧古塔十年擢都統仍留鎮守

賜冠服鞍馬十五年七月俄羅斯犯塞沙爾瑚達擊走之

斬獲甚衆十六年卒年六十有一喪還

命大臣祭奠贈太子太保謚襄壯立碑如例長子巴海襲

爵別有傳

穆克坦

穆克坦姓戴佳世居哈達之杭澗後隸滿洲鑲藍旗方

太祖高皇帝未滅哈達穆克坦隨父率衆來歸授佐領屢從征伐所向陷陣先登

賜巴圖魯號初扎海瑚色之叛歸哈達也穆克坦同父及兄追之父兄俱戰歿從子額爾訥亦叛往哈達穆克坦單騎追斬之天命元年同諸將征瓦爾喀方戰蒙庫及噶哈二人先敗走舒賽阿爾琥達幾被

擒穆克坦與延布哩等八人衝入敵陣敵衆披靡
遂救之出師還

太祖治蒙庫噶哈罪盡奪其所獲以

賜穆克坦阿達海等叛歸明大貝勒阿敏乘夜追之穆克
坦從矢射阿達海阿達海接戰刀斫穆克坦墜馬
身獲重傷六年從征明耀州奮勇登城克之尋奉
命駐防耀州有蒙古人叛去我兵追及之與戰不利穆克
坦策馬直前衝突大呼刺殺首逃者海色餘皆潰

散叙功授二等男世襲

太宗文皇帝即位擢居十六大臣之列理鑲藍旗事天聰元年四月隨征朝鮮有功五年八月大軍征明至大凌河穆克坦以本旗兵隨宗室芬古圍城西南敵兵出城挑戰穆克坦率先徑抵城壕舍騎步戰欲迫敵入壕城上礮矢齊發敵兵復出奮擊力戰歿於陣

太宗聞之曰我舊臣陣亡殊為可惜

贈一等男世襲順治十二年追諡忠勇立碑墓道子愛音
塔穆襲爵別有傳次子溫察官郎中兼佐領第三
子那桑阿任五品官以軍功授雲騎尉世職

武巴海

武巴海姓瓜勒佳世居烏拉後隸滿洲鑲藍旗天
命三年從

太祖高皇帝征明以功授佐領天聰元年四月隨大貝勒
阿敏征朝鮮攻義州與副都統阿山穆克坦等相

繼登城破之五月從

太宗文皇帝征明錦州敵犯我汎地我軍少却武巴海殿
後督戰擊敗其衆五年三月同副都統蒙阿圖征
瓦爾喀進師額赫庫倫及額勒約索收降部衆數
千人而還

上郊勞設宴

賜號巴圖魯六年六月大軍征察哈爾其汗聞我師入境
携部衆牲畜渡河遁武巴海奉

命追捕逃人遇察哈爾兵五人斬之並獲其馬匹牲畜從
征旅順口破敵紀功旋率師征烏扎喇分遣軍士
每二旗為一道四道並進敵方漁于烏里河武巴
海麾騎直前斬級三百餘獲其輜重七年二月偕
佐領郎格赴朝鮮互市獲瓦爾喀族屬十五人以
歸復同叅領吉思哈率兵三百往征東海呼爾哈
部明年五月奏捷俘獲無算十二月同佐領景固
勒岱率兵四百再征瓦爾喀降其屯長芬達哩復

收阿庫里尼滿部衆千餘人凱旋

命大臣迎勞即以所獲

賜之九年十月隨貝勒岳託統兵鎮守歸化城時土默特人來言其部長博碩克圖之子使喀爾喀陰與明通岳託遣武巴海同叅領阿爾津等四人要于路茂罕洩其謀喀爾喀人潛遁武巴海追執之並獲明使者以獻茂罕者博碩克圖子乳母之夫也初從土默特來歸既有叛志私稱博碩克圖子為汗

自稱為貝勒且殺我察哈爾降人至是擒斬之師
還復往追蒙古逃人額勒綽克斬獲有功明年授
副都統加世職一等輕車都尉崇德元年六月晉
三等男十二月喀木尼喀部葉雷等叛挈其妻孥
亡去武巴海率寧古塔及科爾沁兵追之行數十
日無所見遇宿雁三射其一鴈負矢而飛墮往取
之見賊營遺火躡其蹤及之于溫多獲賊妻子葉
雷逃入山追及圍之諭使降不服發矢射之葉雷

將注矢有狐起於前觸葉雷弓弓墜遂殪葉雷併
誅其黨捷聞

太宗嘉其功

命都統等迎勞二年六月叙功晉三等子

賜衣服僕馬莊田三年七月以隱匿本旗罪人罷副都統

任先是從征朝鮮武巴海以所轄戰艦不列汎地
又往圍南漢山城移營時士卒離伍叅領沙爾瑚
達擊敗敵人又詭言不知論死得

旨寬免至是與副都統武善征歸化城以本旗廝卒盜米
徇隱不究論罪折贖四年七月卒無子分世職為
三嗣子傳喀襲一等輕車都尉弟夏色姪錫漢分
襲兩騎都尉

舒賽

子西蘭孫席特庫

舒賽世居薩克達以地為氏後隸滿洲鑲藍旗天
命四年從

太祖高皇帝征明敗其總兵馬林等於尚間崖授騎都尉

世職尋隨征瓦爾喀俘獲甚衆晉二等輕車都尉
太宗文皇帝即位擢列十六大臣佐理鑲藍旗事天聰元
年隨征朝鮮凱旋奉

命同都統阿山等駐防義州八年

太宗親統師征明以鄭親王濟爾哈朗留守

盛京舒賽同副都統蒙阿圖等副之初舒賽率兵攻
城輒被綿甲先登

太祖嘉其勇又慮其輕進

諭止之舒賽益奮勉前後攻克十六城至是

賜敕晉三等男崇德六年十月卒

世祖章皇帝順治十二年追謚壯敏立碑墓道子西蘭初

任佐領天聰元年授騎都尉世職順治元年任護

軍叅領隨副都統鄂羅塞臣等征黑龍江生擒二

十餘人尋隨豫親王多鐸討流賊李自成師次潼

關賊衆抗拒西蘭三戰皆捷二年隨貝勒博洛征

江南招降松江府復隨征福建攻克平和縣有功

加一雲騎尉遇

恩詔晉三等輕車都尉七年卒次子阿蘭襲西蘭長子席
特庫崇德六年襲其祖舒賽三等男爵八年任叅
領隨鄭親王征明前屯衛同叅領覺善等擊敗敵
兵以破克城斬其總兵李輔明順治元年隨大軍
入山海關敗李自成兵進征山西助都統葉臣等
攻克太原府二年隨英親王阿濟格勦賊陝西敗
之於延安自成遁湖廣追勦至安陸與護軍統領

鰲拜哈寧阿等連挫賊衆叙功晉二等男五年四月卒子常舒襲

瑚什布

子穆徹納

瑚什布姓納喇葉赫貝勒錦台什之族人

太祖高皇帝時來歸隸滿洲鑲藍旗任佐領時大貝勒代善屬下阿山阿達海等自負才勇以未遇任用欲他往率屬潜逃瑚什布隨貝勒阿敏追之射殪阿山二子阿山阿達海既入明邊仍來歸瑚什布尋

任侍衛兼叅領

太宗文皇帝天聰二年從征通古索爾和部身中七創戰益力斬敵守將一叙功予騎都尉世職八年從

上征明大同與前鋒統領圖魯什等擊敗明總兵祖大弼軍進攻萬全左衛明總兵曹文詔遣騎兵出城迎戰復設伏邀擊斬三十餘級生擒四人九年分設蒙古八旗都統擢瑚什布鑲藍旗蒙古都統崇德元年隨武英郡王阿濟格征明越燕京攻克定興

縣城凱旋部議出邊時不整隊伍又不殿後致士卒十人為敵所殺罰銀六百兩革世職罷都統專任佐領三年授理藩院副理事官

世祖章皇帝順治四年復騎都尉世職七年九月三遇

恩詔晉世職至二等輕車都尉尋卒子泰庫襲職次子穆

徹納初任護軍校順治三年七月隨豫親王多鐸

討蘓尼特部逃人騰機斯擊敗喀爾喀兵四年任

護軍叅領六年隨英親王阿濟格征大同叛鎮姜

瓌敗偽總兵劉偉思等賊衆進攻寧武關賊帥宜
孟臣來援穆徹納與護軍統領藍拜擊敗其衆尋
運紅衣礮至左衛城遇賊於吳家峪步戰擊却之
十一年隨靖南將軍珠瑪喇征廣東敗明桂王將
李定國於新會先是三遇

恩詔予騎都尉兼一雲騎尉世職至是叙功晉三等輕車
都尉十三年閏三月卒子薩爾圖襲職

席特庫

席特庫滿洲鑲藍旗人世居佟佳以地為氏其父
努顏自佟佳率屬來歸

太祖高皇帝使管一佐領及卒席特庫襲父官

太宗文皇帝天聰五年擢前鋒叅領率兵至明錦州邊界
襲擊明兵之諜者明兵尋犯耀州席特庫馳援卻
敵兵七月復奉

命至大凌河偵軍事有俘獲

上聞明總兵祖大壽修築大凌河城

親統大軍攻之

指授方畧令諸將固守汎地明兵出誘戰並進擊敵席特庫及正藍旗士卒徑抵城濠舍騎步戰裨將多貝戰歿席特庫奮入敵陣取多貝屍還九月大軍擊寧遠兵之赴援大凌河者既接戰我軍一卒墜馬席特庫領纛衝敵援之出六年與護軍叅領鰲拜等畧邊境擒三十人及降明蒙古五人以獻

詔以所俘獲賜之八年正月與前鋒叅領圖魯什等至錦

州松山領軍事有斬獲二月齎

諭至錦州懸於十三站山坡以示祖大壽時察哈爾部人

有散入蒙古席爾哈席伯圖地者四月席特庫奉

命同蒙古布哈塔布囊等往畧席爾哈席伯圖地斬七十

餘級獲其戶口及牲畜尋同卦爾察尼堪率兵二

十人往濟農城躡明兵踪跡至西拉木輪河遇降

明蒙古百人席特庫設伏追擊盡殲之二人逸而

奔席特庫射之殪其一為我國謀者所獲是役

也席特庫以二十人殲敵百人

特賜甲胃以旌之八月隨大貝勒代善征明畧大同敗明陽和守將騎兵九百獲馬六十餘大軍自陽和趨天城衛北席特庫設伏赤城踰月大軍趨左衛城復偕前鋒叅領吳拜設伏宣府並多斬獲十一月叙功晉世職三等輕車都尉九年八月隨貝勒多爾袞畧地山西自平魯衛入明寧武關守將率兵來傾席特庫迎戰斬首十餘級敵兵敗遁十一月

與叅領布顏等領明兵於錦州旋與前鋒統領勞薩等躡明兵於冷口皆有功崇德二年齎

勅諭祖大壽遂自廣寧入邊擒斬十餘人縱二人使齎

諭還錦州三年九月隨貝勒岳託征明至牆子領密雲兵

突出席特庫同勞薩分兵擊敗其衆會日暮收兵獲巨礮二十餘明總督吳阿衡率兵來戰復敗之尋攻真定破明內監高起潛兵追至運糧河三敗其軍敵兵夜犯鑲藍旗營席特庫偕佐領俄兒等

奮勇力戰却敵四年與前鋒叅領沙爾瑚達率將
士畧錦州界敗敵兵俘獲人口及牲畜六年三月
隨鄭親王濟爾哈朗等圍錦州明人自杏山赴援
鄭親王率師設伏席特庫以前鋒兵誘敵來戰佯
敗走敵來追伏發席特庫還擊敵兵大敗之明總
督洪承疇出兵松山城拒戰席特庫復與勞薩敗
敵二隊躡擊至濠而返八月大兵復圍錦州承疇
以軍十三萬赴援席特庫偕前鋒八叅領與戰敗

大同總兵王樸等軍承疇率敗軍奔塔山連戰敗
北旋奔杏山席特庫橫衝馳突敵大奔潰我師追
至筆架山斬四百餘級獲馬二百四十餘大纛六
松山杏山二城兵有潛遁者席特庫與前鋒叅領
布爾遜等屢襲擊之先後追斬數百人獲馬駝七
年二月大軍克松山城率前鋒兵駐塔山明寧遠
兵千騎掩至席特庫合八旗兵追至連山有斬獲
功十月貝勒阿巴泰征明入長城豫郡王多鐸率

師往制寧遠錦州援兵席特庫從遇寧遠兵擊却
之晝夜巡偵俘明兵十五人斬四十餘級以功晉
二等輕車都尉旋合左右翼兵從界嶺口毀邊牆
入敗明大同兵之往守山海關者既克長城明薊
州總兵白騰蛟率步騎奔桃林關聞我師將攻薊
州騰蛟以師馳還與馬蘭峪總兵白廣恩合師拒
戰席特庫同前鋒叅領瑚里布麾衆奮擊敗明兵
數千陣擒叅將一斬遊擊三獲馬六百餘順治元

年四月隨睿親王多爾袞入關破流賊李自成偽將唐通於一片石六月都統葉臣率兵定山西九月

世祖章皇帝命席特庫往助其軍至絳州渡河沉賊船十

一月抵汾州平陽逼賊營賊出戰追斬四千餘級

降賊將康元勲於西山寨進兵黑龍關復降明守

備三員兵三千人二年自成遁入湖廣席特庫隨

大軍追至安陸府斬四百餘級收獲戰艦叙功晉

一等輕車都尉三年豫親王多鐸率師討蘓尼特
部叛逃蒙古騰機思我軍自土喇河西行喀爾喀
土謝圖及碩雷諸蒙古各以兵遮截席特庫率衆
奮擊追奔數十里斬獲無算四年叙功加一雲騎
尉七年

詔錄叙舊臣晉爵三等男子世襲九年

恩詔晉一等男康熙五年三月卒年七十

賜祭葬子塞爾古德襲

巴泰

巴泰漢軍鑲藍旗人姓金氏天聰五年任二等待

衛從

太宗文皇帝征明圍大凌河城明兵自錦州趨援我師迎戰侍衛尼牙漢中傷墜馬巴泰馳入敵陣援之以出六年從征明大同敵馳射我叅領席特庫巴泰突前衝擊敵遁走崇德元年隨睿親王多爾袞征明至沙河生擒哨騎一斬九人獲馬八我偵敵者

至楊村為敵所困巴泰馳擊斬其一人敵潰走旋
師出邊率十人偵敵三屯營敵有奪我馬馳去者
巴泰追斬之取馬以歸六年隨鄭親王濟爾哈朗
征明錦州敗其總督洪承疇兵比還巴泰殿後敵
追者猝及面中流矢仍躍馬揮刃斬一人敵乃卻

上嘉其善戰併錄前勞授雲騎尉世職尋擢一等侍衛

世祖章皇帝順治二年以勞績久著晉世職為騎都尉尋

遇

恩詔加一雲騎尉時睿親王攝政內大臣索尼侍衛巴哈

護軍統領鰲拜並以弗附睿親王坐罪罷任降罰
有差巴泰亦弗附睿親王王問以鰲拜索尼相善
否巴泰對弗知又問爾與索尼善否對曰我二人
同直相善於是罪以偽稱弗知削雲騎尉世職並
罰鍰

世祖既親政復世職屢遇

恩詔晉至二等輕車都尉十五年

命列散秩大臣旋擢內大臣

聖祖仁皇帝康熙三年擢國史院大學士

賜敕嘉其曩日不附睿親王克抒忠悃晉爵三等男六年

充纂修

世祖實錄總裁官時鰲拜輔政惡巴泰不附已會以輔政

大臣蘓克薩哈論事齟齬構陷其罪集衆定讞慮

巴泰有異議弗使與聞七年二月巴泰以疾解任

八年五月鰲拜獲罪逮繫

上召巴泰授秘書院大學士仍充

實錄總裁官九年十一月改內院為殿閣以巴泰為中和

殿大學士兼吏部尚書又

賜敕嘉其忠藎勤勞晉爵一等子十一年以

實錄告成

賜銀幣鞍馬加太子太傅十三年以疾乞休

詔解任調理十四年

命仍入閣辦事十六年七月引年乞休奉

旨卿以年邁請休情辭懇切准原品致仕念卿宣力有年
清端勤慎以朕所御冠服特賜與卿用旌老臣昭朕始
終眷念十九年復起為正黃旗漢軍都統二十三年乞
解任得

旨俞允仍

命以內大臣銜與朝請二十九年卒

予祭葬如典禮諡文恪子蘓赫襲爵

愛音塔穆

愛音塔穆滿洲鑲藍旗人姓戴佳一等男穆克譚之長子也

太宗文皇帝天聰六年襲父爵九年以穆克譚舊轄人戶益以壯丁五十授愛音塔穆為世管佐領

世祖章皇帝順治元年四月隨睿親王多爾袞入山海關擊敗流賊李自成十月豫親王多鐸奉

命赴河南討賊愛音塔穆同副都統沙爾瑚達屢破賊兵追至潼關賊來犯我師者三愛音塔穆殿後連擊

敗之明年大軍既定河南進克江寧愛音塔穆並
在事有功六年八月隨鄭親王濟爾哈朗征湖廣
時明桂王朱由榔據武岡湖南郡邑半附之愛音
塔穆率兵至寶慶擊走偽總兵馬進忠王進才復
其城流賊劉體純亦附由榔遣其黨袁宗第等列
十寨於沅州之洪江鎮隔岸拒守愛音塔穆與尚
書阿哈尼堪督兵渡江連破賊寨賊悉奔潰遂與
阿哈尼堪駐守沅州十二月賊將王強犯沅州復

與阿哈尼堪擊敗其衆十一年由榔將李定國陷
新會時平南王尚可喜等先率兵往援定國擁兵
四萬餘列象礮據山峪為戰守計愛音塔穆隨靖
南將軍珠瑪喇至廣東率兵協勦奮勇衝擊大破
賊衆追擊二十餘里定國遁走先是愛音塔穆
遇

恩詔晉爵至二等子至是叙功予騎都尉世職合為一等

子加一雲騎尉康熙十九年正月卒

賜祭葬如例子公圖襲三十五年隨撫遠大將軍伯費揚古征噶爾丹敗賊於昭莫多加一雲騎尉合所襲之爵為三等伯三十九年卒子噶敏圖襲

都爾德

父阿爾岱

都爾德滿洲鑲藍旗人姓覺爾察安費揚古之孫也父阿爾岱任佐領天命十年率兵戍耀州禦敵有功授騎都尉世職天聰五年從征大凌河歿於陣

卹贈三等輕車都尉都爾德於天聰八年襲職順治元年正月任刑部理事官四月隨睿親王多爾袞進山海關擊敗流賊李自成十月豫親王多鐸統師征陝西都爾德署護軍統領以從十二月至陝州見流賊據山巔即率衆先攻拔其營還軍殿後賊來追戰却之明日設伏潼關賊至斬獲無算二年正月賊將劉方亮合千餘衆逼我營都爾德同護軍統領圖賴等率兵迎擊賊衆潰走尋隨大軍由河

南下江南破明兵於揚州城北獲戰艦百餘既克
江寧明福王朱由崧奔蕪湖復率兵邀截之江口
俘斬大捷三年十一月隨端重親王博洛平浙江
進師福建與前鋒叅領拜音岱攻建寧延平二府
下之明唐王朱聿鍵遁走汀州同護軍統領阿濟
格尼堪率兵進攻擒斬聿鍵及其官屬遂定汀州
五年九月鄭親王濟爾哈朗統師討湖廣流賊李
錦等都爾德從征所至有功六年十二月流賊王

強犯沅州同尚書阿哈尼堪率兵破之斬偽副將
三人殲其衆獲馬數千七年凱旋授護軍統領八
年

命為議政大臣先是兩叙軍功晉世職為一等輕車都尉
至是遇

恩詔加一雲騎尉九年再遇

恩詔晉一等男康熙三年七月卒

子祭葬如典禮謚忠襄子席布襲爵

[illegible]

欽定四庫全書

欽定八旗通志
卷一百七十八

欽定八旗通志卷一百七十八